

四庫全書

集部

欽定四庫全書

御定歷代賦彙補遺卷十八

言志

求志賦

有序

元  
袁 袁

古人以賦托志或比擬賢哲或寓情幽怨或述已出處  
若慙志復志述志之類非一大抵皆假設仿喻依楚語  
屬辭余老於憂患年垂耳順白首無成因想先世遺業  
叙次為求志賦其言曰

稽胚暉之攸淑兮肇啓迹於虞嫺逮流肩於公滿兮實  
楸衍於大姬爰錫胙於汝潁兮廣采壤於餘支及嬴項  
之蹶仆兮通宛洛之說辭固守儒以卒業兮闡炎漢之  
由噦鍾厥美其帝傳兮暢奕葉以演迤厯東都之繇楚  
兮終江左而隆衰清風邈其復振兮參王謝而並馳粲  
抱道而質義兮徇石頭以燭夷誼推本以篤烈兮謂其  
信之在茲世悠悠而遐迴兮竊譜謀之莫推跡芳馨之  
所由兮劬隴畝以為基值文明之泰亨兮奮德義於海

陟汜登名於太常兮翼時意以驂駢振英風於句越兮  
難榛蹊而闢之聯魚符於南北兮敞家聲以騰輝方渡  
江之中阨兮興禮樂於浙瀆瘠伊洛之鴻源兮本沂泗  
之宗繫始揚武於鷺雍兮嗣冠名於虎陛挺正色而不  
阿兮粵忠讜乎繼世佩太阿之森鉉兮壬佞嘯喑以匿  
避激淵淪於頽波兮從喑鳴而獻歆黯抗言以疏遠兮  
弘曲學而高位卒滔滔而莫返兮竟掩冉而淪棄悼蕪  
城之荒蔚兮莽荆榛之翳蒼山川鬱其嵯峨兮俛榮華

之銷瘁耿脩名之焘焘兮齊往哲而超詣乾坤俟其凌  
薄兮儼陵谷之變遷盛衰渺其難諶兮何興仆之後先  
駕方舟於弱水兮刈菴鋪於石田躬勤瘁以畢歲兮挽  
吾輶而莫前造窮山之岑峒嶽峯兮鄰豺虎之嗥突競  
贐汲線溜於荒谷兮刈菴藿於墳衍離阨危於嬰稚兮  
紛傲擾而巡蹇覽古人以為前兮徵往轍而訊驗仲翁  
俯首以綰綬兮望之落落以抱關衍秉剛以放逐兮永  
默默以名宦閔仲翔之通筮兮屏南郊而不返既昭塞

之有時兮縱余情而舒卷迺退而雙伏兮寄余懷於  
編簡雷營營而無寐兮精炯炯而申旦縣朽綆於智井  
兮悵羸餅而三歎兮橡栗於羣狙兮心倉兄而不伸涉  
江海而行邁兮追奔驥之飛塵羌骯髒而寡與兮若昧  
膜以問津忽荼毒其重罹兮哽顛連而悲辛髮種種而  
既童兮齒零落而輪囷叩辜愆於蒼昊兮雲漠漠而奚  
隙躡九死而一蘇兮屬微息之僅存契靈龜以負卜兮  
墨未食而已湮卒罔罔而迷適兮掩余袂以沾巾謂玄

化之窈冥兮爰屏肅乎營魂形彷彿於噩夢兮喻至理  
之所循俾內省於微躬兮曷怨尤乎天人既爾生之肇  
确兮泰四體而靡勤仰哺啄以尸居兮媿胼胝之鰲黔  
下不能以傭力兮上不足以奉承乎大君徒內哭於願  
欲兮宜外劬於甄鈞觚不觚而靡用兮固宣父之所云  
挾章甫以賈粵兮遇侮慢而誰因波漉漉而東駛兮日  
瀏瀏而西輪睇修途之逾邈兮飲余馬乎江瀕佩脂韋  
以假飾兮顏屢頽而已沮日愀怨以流盼兮心壹鬱而

誰語緣微徑以援援兮察愚智於今古蘭芳馨而自煥  
兮松流膏而斤斧膺厲節以殲類兮蟠渾渾而容與登  
長嘯以夷猶兮康皎潔而觸悟威忤舞以委誠兮耄失  
節而罔措徵執中以事讐兮色侃侃而愈嫵諒合散之  
靡常兮豈得喪之有數委吾形於大順兮昭惠迪而內  
顧踐康莊之夷軌兮黜健美而罔慕頤天真於玄玄兮  
鍵靈關以自固尋至道之所歸兮去性根之蟲蠹念英  
葉之難再兮惜吾年之云暮全所守以解駭兮結余轡



於馳騫逍遙乎無為之園兮采芝英以甘茹滌瑕垢以  
保躬兮依名德之為據寄遙情於冲漠兮將弭節乎藝  
圃激玄冥以漱潤兮伏神雀於丹淵掉蒼龍使騰蹕兮  
執白澤俾潛藏御飈輪以登太淵兮叩招搖以周旋斟  
瑤池之縹醕兮與大椿而論年嗟薜英之卒卒兮徒掩  
抑於逝川精銷委以鮎鰲兮玄頂忽以白顛惟守中以  
返朴兮詎索隱之是專矚雲霞而游目兮味泰和以自  
堅屏紛濁以純一兮却智慧而俱捐警夙宵以康神兮

祇吾性之所天既命義之蹉齧兮置休戚於自然泊虛  
舟於回渚兮逝將返乎故土問耕鑿於沮溺兮綸陵陽  
之綱緒食所力以保終兮企優游於末路希幼安之靖  
共兮濯清冷而遊豫風颯颯而淒厲兮凜蘄葭之霜露  
蹇躓豈其願兮摧輪亦吾所深懼求正志之所蘊兮庶  
無忝於祖武亂曰已矣乎吾誰適與歸荆塗莽莽曰耘  
治兮灌溉根芽長菱茲兮守質養素不傾散兮外息驕  
吝內自怡兮明明在上毋我欺兮超然而存無所為兮

誠心不疚允坦夷兮

蕭齋求志賦

明  
祝允明

斐然自尚者亦靈區之助歟匪閔丘兮絕世猶先井兮  
攸附帶邇郭兮成構挹遙垌兮為趣雲岑列兮繇邈芳  
洲緯兮縈互囂聲止兮層垣幽風暢兮洞戶碧蘿交兮  
施宇紫萼團兮繡路虛泉鳴兮漱除淨壁晃兮搖樹宵  
竹鏤兮黃月曉松沈兮蒼霧露疏蕃兮璇綴霞標建兮  
錦傳擷芳馨兮蓀蒞玩趙吳兮磨兔肆珍圖兮高張敞

嘉名兮特署爾乃登丘陟墳沈章漂句寶蔡子兮祕笈  
侍房君兮豐庫流璋琬兮華琰絢星河兮森聚苞周紘  
兮廣獵沂真源兮孤赴測潛機兮太冲懸皇鑑兮鴻素  
抗五大兮齊襟拊百氏兮獨步攬萬化兮棲臆操三才  
兮在馭於是謝將迎遺倡和任簡傲安晏情九域蟣蠓  
萬類淚唾或同心兮晨集羗佳人兮宵過蹇淹留兮夷  
羊聊從吾兮妥隨攬蒙瀨兮齊塵侍周孔兮末座平伯  
禹兮後洛補皇媧兮餘破摩丹霄兮鸛運函玄珠兮龍

卧乃歌曰浮青陽兮蕩素秋日月居諸兮與化同流今  
我不樂兮乃將焉求歌已爰命樂童陳浩倡奏元間鳴  
清商極變聲兮靡曼陶淫思兮太康余乃掩抑衆律孤  
引圓吭凌青旻以飛嘯兮揜衆音而不揚操皇雅以獨  
鼓兮寫神襟於混茫忽白日兮晝冥振衝飈兮襲堂川  
鱗躍兮出潛霄翼接兮不翔吟九淵兮神蛟舞千仞兮  
文凰騰江河兮擊春盞泰華兮低昂斯時也獨御正陽  
高聳物先呼吸罔象遨嬉泰玄與神明兮乘居視蕭蕭

兮墨然

感志賦

元  
李好文

何天地之寥邈兮眇予生之有身履黃坤之博厚兮仰  
玄覆以無垠鑄衆金於大冶兮偶形留夫粹質苟莫邪  
而弗自砥兮固鉛敵之所同服蒙予若之倥侗兮承鞠  
訓於自宮佩非善而罔繫兮服非惠而匪躬譬革之申  
申兮鞘余觶之容容擷秋圃之日精兮濯淤漣之荷華  
卻穰李而弗御兮矧穡臭其焉加歲翩翩其不居兮首

元服以及冠恐罔兩之挾余兮門面牆而無見思假道  
於書林兮求孔氏之高明遵文衡之逶迤兮愈多岐之  
縱橫助愀怛而莫適兮從文公而徵詞曰爾神潛而志  
栖兮終必達夫所期果服言以從事兮羸十年而戾之  
覽天庭以游目兮又欲窮夫四遐觀百氏之原委兮究  
異說之貞訛泝太初之無始兮循三王之不頗總條理  
於一聖兮固馴致夫中和汨余有志於古人兮懼脩名  
之嚶嚶忘漆雕之自信兮懽學優之有得謂青雲其可

力而致兮謂時命之可弋較余行之吉日兮遂觀國乎  
上京指閭闔以徑往兮奄長風而北征眩天都之雄麗  
兮非下土之能名信魚龍之所混并兮亦名利者之為  
場余既初無赫赫兮又何適夫煌煌翱翔捷步之高才兮  
豈扶服之能躅挈桔槔之類仰兮恐祈榮而離辱夫何  
衆之熙熙兮我獨約兮而為德資章甫以適越兮固前  
修之所為惑飡玉羞以燎桂兮囊日索而焉留有東昏  
之故君兮盍歸來之為謀浮輕舟以南下兮亂海澨之



交流返弊廬以窮處兮迄於今一紀其將及晝于茅於  
南畝兮宵索綯而未息傷鵲鵲之原居兮慮鷓鴣之無  
室遠子荆之有美兮羌終棄乎草澤余非昧而至愚兮  
誠有徵乎前哲聞耕獲於道德兮內懷寶以自珍豈畎  
畝之足樂兮閨閭漠而無聞音樊須之請稼兮迺獲謂  
於聖人摯冥冥其鴻飛兮猶釋耒乎有莘溺耦沮之不  
反兮又奚足與為羣悲此志之未伸兮秉經德之不回  
心飛揚而披離兮曷日夜而疚懷亂曰鹿之斯奔兮其

足跂跂河魚衝波兮乃窺其尾物終必反兮有張斯弛  
往不必求兮來者是族庫不隨阿兮險不期詭貞途安  
行兮不易厥止優哉游哉兮於以自夫

定志賦

有序

明  
魏學伊

書曰詩言志班固曰賦者古詩之流也夫余遨墳典之  
圓遊先詰之衢舍魯奚適矣顧衆兆馮生各有攸驚根  
柢未定見物斯遷思以纂至人之餘徽繕厥初之貞性  
是北行而南其轅也必不幾矣老子曰不見可欲使心

不亂蓋亦自閑之善策與雖然土之塊然也入水則淫膏之澄然也遇炎則沸程伯子之喜獵而復萌於十二年之後也不見其可恃哉陸行而語人曰善沒善沒無徵也浮江河而不波則真善沒者矣袖手而語人曰奇勇奇勇無徵也舉九鼎而不碌則真奇勇者矣尸子中黃伯曰余左執太行之擾而右搏雕虎惟象之未與吾心試焉試云者蓋假以自徵者也余故騁辭乎滔蕩之場肆情乎荒唐之域窮態極變嗜慾畢陳明晰者昏眩

貞確者淫放忽忽欲身試焉已迺收其佚思返乎芳躅  
澹然無營屹乎其不可移斯以為定志之章習非吳粵  
水亦不可浮也力非賁諸鼎亦不可舉也定志於既試  
之後者君子所以不輕恃也定志於未試之先者君子  
所以不輕試也孟陬之旦抽斯言以為繩余其不摯勵  
焉其辭曰

歲協洽之始旦兮氣凜冽以淒淚雪霏霏其颺曳兮風  
淅淅而鳴厲庭木菸邑而無色兮春陽其猶未戾相烝

族之嬉嬉兮各怡懌乎改歲輪蓋巖其雲蔭兮閭閻闕  
嘖而陰堅士簇裘馬之劇觀兮女飭媮靖之纖製笙鼓  
嘈雜而狂會兮粉拱翕葩以增麗彼時俗其固然兮亦  
良辰之可懷忼邑邑余紆軫兮獨鬱而歎懽攝提遷以  
端邁兮汨赴阪之迴湍昨總角而象舞兮俄岌岌之高  
冠豈不諒晏虞之為適兮時曷可乎久盤昕皇皇其遶  
柱兮夕抱膝而永嘆印前修以內恕兮增烈烈之重寒  
彼駉駉之咫尺兮夙雄眇乎千里干將脫劍而契鐵兮

曾何需夫鈍砥禹龍躍而雲滂兮瑜虎嘯而飈起寧華  
髮之隋顛兮忽剡鋒之迅駛昔魏武誠鄴城兮道頓丘  
之無遺矢雖嶮夫匪攸慕兮已森森堅其壁壘豪桀各  
有所締構兮疇不猛晉而惜晷咨非躬之溝猶兮足蹠  
跼而不前覲瑋迹而婁奮兮怵長路之繇繇曰矯節其  
可好兮羌發軔於髫年竊祗奢覲而苦耕兮莠驕驕於  
甫田糾余生之步履兮洵重誣而馳讐辟反徑之幽隘  
兮昏窳而不覩天翫媚俗之追曲兮辟踰踰以嬋媛文

好顏以為媼兮匪余心焉攸便遂肆志而橫鵷兮教廷  
頽而不遷謂彼原我猥兮塞宜遺此迤邐盡反性命之  
眩潛兮我與彼其俱然湛芳蘭以鹿醢兮越三年而易  
馬或厥根之漸洳兮僉委實於中野吾誹蘭之不馥兮  
豈芳草之尤也謂九畹可勿樹兮充幃之羞也滋德行  
以竣楸兮願及年之方華辰漸冉其逾逝兮懼霜雪之  
浸加蹇余隋急以成性兮羗心疾乎浮夸任顛替之牙  
牙瑜不琢而為瑕繁弱之洞堅兮資排檠而體正儀狀

曄其齊觀兮庚增飾而俞靚  
夔前詰之不羣兮聿矻矻  
其抗精疇怠荒而降伐兮孰消搖而躋聖豐牆堦下兮  
恐行潦之隕崩榮林淺根以浮埃兮森風吼而上仍蒙  
鳩編髮以為室兮奄焉喪其所馮馮生總總其靡定兮  
展余心之所懲余既懷此眇思兮冀雪焉豁其蒙蔽修  
途迢遞而亡鄂兮余乃夢夢其未睎紉留夷以為帶兮  
緝胡繩而為悅願衆芳其繁庶兮選蔡莽之螫劇茲只  
尺吾弗曙兮矧出門之數蹶焉猶豫而廓處兮將譎譎



以永世誕周流覽觀以財擇兮余乃知吾所憇脂余車  
於家巷兮秣余馬於道周亂余輿兮容裔攬余縶兮夷  
猶神猓猓以惚恍兮行極目乎中州睇闌闌之囂擾兮  
各營營而有求津要雜沓以叢穎兮紛勺灑其綢繆焱  
焱聲談之燁燁兮訇訇轂轍之殷稠遭時而適志兮競  
侈侈以忘憂聳層臺之將將兮駢雲屋之爛爛蘭橈埽  
塹以交錯兮桂棟曼衍而炳煥飛檐嶧嶧其矯起兮彤  
軒爽塹而皓旰絳雲斐疊以異櫺兮杲日射疏而粲與

砥室繽紛其致飾兮琦璫雜璘珣而零亂目迷青蔥與  
蘋素兮曾莫殫其珍翫美參霄之臺榭兮又羅花木之  
芬芬薰風習習其拂袂兮桃李爭豔於春陽憐芍藥之  
妖麗兮佩蕙芷之幽香桔榴噴而然階兮泥菡萏於池  
塘芙蓉綽約其臨流兮菊英矯潔而凌霜梅抗雪而揚  
葩兮百卉不敢與詡詡周亭渚而徧眺兮爛菲菲其流  
光余聊絕夫嬋序兮展更僕而不可詳既牽攬之娛情  
兮又杯竿之好合淥醺醺以醅酢兮蘭肴烝而迨還熟

熊蟠之鮮臠兮烹豹胎之煜爚旅臠螯及肥腴兮兼炮  
羔與雞臠揉黃蘇與露茹兮調葢羹而先鬻蠃醢醢其  
蟻浮兮分牙籌而司酌衍芳顏之微醺兮忽女樂之雜  
陳竽瑟淫淫其繁會兮賁鼓震動而鼗鼗新聲參差以  
迭奏兮謳與歆而交囂衽褊褊若交竿兮樂妙舞之肄  
肄華袿飄颻其從風兮羅襪躡蹠而逡巡鴻翥而鳬  
沒兮曳蘭緒之糾糾歌與舞既酣悅兮客酩酊其徑醉  
蘭膏熠燿其逾明兮紅妝陞坐而無次嫋眼眇其騰光

兮聯曾波而遺視雜杜若於輕裾兮握纖手之芳臙眉  
連娟以繚繞兮腰嫵妙以佞媚申厥好於九秋兮勿墮  
情以遐棄魂忽忽以搖蕩兮孰桑門與展季窮聲色之  
湛樂兮羨滄海之無期聊遨遊以媮快兮俟河清乎幾  
時余聆茲靡靡之瑣說兮忽亢志而長思初旦旦有成  
言兮曷回畔而自嬉不見金谷之遺禍兮誰樂極而不  
衰士幼服先民之炯戒兮咸敦勗以自持出豔繁華之  
可者兮意默默其浸移朝愍黨人之酒沒兮暮褰裳而

就之還訕介士之特立兮長顧領其何為曰吾豈涉而  
遽汨兮聊與之逶迤醉夫自為醒兮旁觀輟然而相嗤  
余不忍厥躬為嘗試兮夫安能乎留茲遭吾道以遠逝  
兮正余策乎徂征僕夫喃喃其詢諄兮馬裴回而不行  
既舒節而遂晉兮相余心之所明苟蠟蠹其可浮兮詎  
駸駸乎丘陵枯槁匪足尚兮亦云企夫修能去琢蠹之  
既遠兮俛俛其焉憑厯閭闔而諦覩兮余馬且焉止息  
何土習之匪慄兮云游俠之所域好傾身而締交兮集

輕詔之奇客美賓從之萋苴兮張威聲之赫奕冠劍紛  
紛其從衡兮珠履晶瑩以千百鵠俊桀以巷飲兮笑肝  
膽之不隔雙耳熱而長嘯兮須髯豎而如戟或尋橈與  
扛鼎兮或投壺而呼白既蹴踘以漫戲兮又分偶而扞  
射窮鄱陽之暴謔兮輕千金之趙璧攬於菟之重裘兮  
橐籥門之烏號左夏服之勁箭兮右步光之霜刀縱晨  
風以馳獵兮燎千里之蓬蒿颺礫飛而蔽天兮豺狼驚  
而怒嗥氣歎勃其不懼兮拉彪羆於窮臯踏深雪而夜

歸兮呼美酒而烹羔躍馬顧盼兮誇一世之雄豪召屠  
亥使麾鉞兮呼漸離使擊筑滄海忽其錫賊兮慶卿因  
之痛哭持牛炙而啗政兮解佩劍而贈育朱家嘻布之  
髡首兮要離誚訴之眇目招原朱於二陵兮各意氣之  
相逐忽中宵叩門兮號胸臆之不平柄人哮闕兮姦人  
猙獰戚人肆毒兮生人食盟中憤憤其憑怒兮訝烈焰  
之橫生彈丸發而巨讐殛兮杳莫蹟其姓名抑恂恂罔  
德色兮沒齒而不自鳴嗟夫人之慷慨兮殆燕趙之風

也亶聲聲其磊砢兮然狙獾之雄也睚眦蠶芥兮忽肆  
諸路隅交遊罕擇兮禍發於錙銖萬乘恣其凌轢兮悲  
厥終之可虞馳余興吾適發兮羌去去而弗顧士超超  
以跖弛兮鮮不軼乎常度壹睢盱亡檢柙兮良古人之  
所惡志擔矯以亢厲兮覽八極而尚羊曩蓬矢之俶縣  
兮肇有役乎四方長湛鬱其弗舒兮偕秋草而萎黃超  
拂拔以遐騁兮收余駟於邊場戈鋌林立以彗雲兮旗  
旒飛颺而拂蒼散貔貅於虎落兮聽鳴鏑而夜愴彼越



甲鳴吾軍兮竊憤醜虜之跳踉壯夫生而燕頷兮死馬  
革其奚傷震鬱怫以滌怒兮目閃爍而揚光吾願上關  
威弧兮落層玄之橈槍戲下煦煦其挾纊兮又慄慄如  
負霜士忽然而鏖戰兮曾莫抗其顏行鯨鯢擣以成觀  
兮豺虎磬而催藏天驕絙於塞外兮適威名與俱長帝  
赫赫詔入關兮奏膚績而四覲閭棘傑儻其前列兮鉦  
鼓嘈囂而雷振猛士騰躍以彪悍兮玄蚪沛艾而奮進  
佩長劍之陸離兮肘纍纍之金印天子嘉乃成烈兮躬

設勞其懋蓋玉厯頒於白蘭兮  
蜀賓懾而內賁東震日域之景國兮  
西壓月窟之末肩陋驃衛之梨磔兮  
祇黷武而開鸞虎賁固所容鞭撻兮  
屹長城之坐鎮余既難夫橐駝兮  
展承慕此崇功意飛揚不可以戢兮  
恐性行之管管毒龍矯其上騰兮  
海水沸而洶溶肆虓虎之跋扈兮  
驕豕躅於遼東憑不顧夫罽罽兮  
奄抱慟於良弓或殖醢之幸脫兮  
引猿臂而自雄顧桑榆之夕景兮  
忽回首而長恫東流逝以不返兮  
悵偉伐之俱空壯心頽

於麟閣兮託遠想於喬松旋余輶以徂往兮竭栗然而  
曾舉棄經營之擾攘兮求真人與之語願令介鳥前驅  
兮為通言於玉女意眇忽其凌雲兮望三山而延佇朝  
余發於中土兮夕余稅於丹丘羽人踟躕其成羣兮絕  
雰埃而宣遊郊神明以高厲兮朋精粹而為儔垂蛻蟠  
之離離兮總蚪旄之浮浮攬慧光而為旂兮揭招搖以  
劉流掣列缺之淫裔兮駕飛廉之颼颼望舒瞭皎其騰  
輝兮豐隆砢磤以彪休仰旬始其密邇兮尚神達之可

摶怒戴勝有佻懷兮合羣仙乎好會將祝融前效軫兮  
詔勾芒使展軼葍收跬蹀以樹旗兮玄冥狂趨以綈蓋  
紛紜鏗鉤轟以輶軋兮雜還轆轤隱以礪磕烟煜煜  
闐以砢汭兮騖瞿眦旁錯以賴跲騰驤迭湯瞿以趨蹕  
兮躑躅叫鼻齏以渙霈青蚪赤螭蹇其天矯兮棼棼衝  
從以奔駘忽清霞爛編其異采兮逌仙侶之雲從揖岐  
伯暨倕佺兮跼羨門與韓終邀桐柏之王子兮攜南嶽  
之赤松既招方回於五柞兮又迎葛由於綏之漲誰卷

卷其緝御兮候金母於木公賓翩翩交集兮於茲焉舉  
觴屑瑤藥為饌兮掄瓊靡為糧吸沆瀣為餐兮斟玉醴  
為漿漱飛泉之微液兮咀石菌之華英列如瓜之巨棗  
兮采木末之芬香眷明光之媿娛兮咸欣欣其樂康賓  
既夷悅兮於茲焉式儻拼湘靈弄瑟兮使馮夷擊鼓子  
晉吹洞簫兮青娥為夏拊叩昆明之曉筑兮彈雲璈以  
琚櫜歌太霞之妙曲兮裊餘音之縷縷耽清都之節族  
兮長無極以終古余竊樂此眇界兮迥異乎曩之所陳

聲色沉濁以冶蕩兮茲獨沕穆而渾淪心泚泚其浩曠  
兮憺委佗以怡神駕白鹿余濯髮兮乘黃鶴余晞身載  
青鳥陞閭闔兮狎紫鸞之馴馴登閭風又微閭兮儷無  
始而為鄰餐六氣以遐驚兮焉熊經與烏甲驟噫鬱余  
怊悵兮悲滄桑之數變木羊躡而一足兮紙驢碎而成  
片石橋梁瀟以灑沫兮銅柱堦圾其如綫紀崦嵫與腸  
谷兮經咄嗟而忽徧竊聞令威歸遼兮蘇耽返乎故鄣  
屋廬夷為鹿場兮椒壁荒而存壁白楊蕭蕭其嘶風兮

枯柏陰翳以連卷鬚豎彎弓以彈射兮爰飛鳴而悲吟  
展悽惻其若茲兮又何長生之足羨徐生入海兮五利  
以為師攀龍髯之蜿蜿兮射魚鬣之狝狝雞犬不獲偕  
升兮卒聖賢之見咤豈徒誚其尠成兮實心咎其貪癡  
道坦坦其平廣兮罔喬怪以炫奇靈臺泓滑以不守兮  
胥日用而耘之余焉庸此詭誕兮祇質質其狂馳汧蓬  
壺以迅征兮策余服乎吾將反邇有伐而難循兮理有  
諛而匪遠羌昕夕與食寢兮余乃哀驚而旁遁速黽勉

以遵路兮趁睢靈之未晚既律嶠其遄歸兮弛吾轍乎  
故閭彼紘紘祇攬心兮冲舉又夸虛攝浮氛以復正兮  
屏萬慮而獨居東汎剝之纖慧兮信印志於古初羌悴  
掌而樵精兮密追琢其璚璵逢萌視恐或實兮敢怕慢  
而跌諸螾罔爪牙之犀利兮穴槁塹而為居蟹二螯又  
八跪兮顧曹螾之弗如余乃寤夫繕修兮塵夢寐之拮  
据椽中貞為基兮葺禮儀為廬築沉深為冥兮豁神識  
為疏蹇憔悴印弗憚兮跂往聖之高衢慙余質之凡駑



兮單千百猶未迨望平原而勇趨兮猝遭躋於危巖意  
蹙蹙若有所懲恣兮忽又事去而忘改漫搖筆以雄視  
兮矜文章之五彩綜綺縟之粲粲兮映冰壺之皚皚啓  
汲冢及西巖兮固菁華之所在漱羣芳之津潤兮振麗  
藻而奇俊頤墳素以誼形兮雖蓬垢其弗悔謂顓顓喪  
厥志兮戎相尋於罔殆閔醢難而發覆兮徒與鼃乎語  
海余願斂華而為實兮先樹本以為華扈尼訓之晔晔  
兮株繩墨而不柰翦蓬草勿繁翳兮俾昭揭於坦涂循

茂則而忽悟兮超永逸乎濃窪曦曦其中天兮何隨  
侯之照車堅卓犖之貞性兮入善劑於中和剡靈光其  
內葆兮允融洩以婆娑亡憤疾流俗兮局蹐為小儒蠖  
詘曲以局身兮蟬戢翼而長矜彼鸞鳩之譏陋兮惟榆  
枋之與俱勿恢張蟲伎兮凌厲乎九區烏惡美羽而句  
啄兮魚畏侈口而垂腴憫文豹之來田兮詎華采之不  
殊鳳凰翔而翱翔兮應龍陟皇之赫戲闕芒芴以隱見  
兮妙變化於有無瞻羣族莫絜沆兮謀邛志之攸圖筴

夸父之捷步兮堙瀚海而搏塗矢余願罔却顧兮羌弗  
病其為迂亶厥躬無離託兮吾獨征乎又何需歌曰風  
憾憾兮薄寒雪瀟瀟兮姜柯偲辰光兮迅邁蹇蹢跚兮  
蹉跎閑衡門兮浩歎疚余心兮實多載歌曰遊思盪兮  
激昂俛跼蹢兮徬徨涉嶮谿兮愴怳眊經塗兮周詳誰  
與余兮同好余將往兮褰裳

閔志賦

有序

明  
謝肇淛

謝子既嬰塵罔留滯齊魯之鄉心煩意懣不知所為傷

居諸之奄逝感草木之變衰老期將至勲業無成惻然  
不覺涕之無從也迺作閔志之賦夫小雅怨誹而不亂  
楚騷眷戀以自貞敬通擯棄於明時小邴滯淫於末秩  
平子幽思安仁閒處每攬昔人興感之由其致一也要  
以幽憂之疾鳴而不失其正故言之者無罪而聞之者  
可以風焉其詞曰

繫崧嶽之降祗兮帝元舅之委嫗戎良翰於南甸兮皇  
祖荒於海濱賈歐冶之扶輿兮鬱五丘之黷氣強圉麗

於單闕兮惟大晉之將晦紛衆芬之彫落兮羌余蛻螳  
而下界適匍匐其岐嶷兮又重之以姣好榮凝脂以朱  
楊兮爰嬋媛於襁褓余既滋江干之杜蘅兮復執脩岡  
之蘭茝潏湘沅之萍蕩兮歷九疑之塊塏秣予馬於星  
沙兮弭予轡於熊之隗夕容與於衡皋兮晨迴翔於岫  
嶰峨吾冠之切雲兮曳蘋霞為余履晞余髮於汨羅兮  
吊纍臣與山鬼駟文螭以蹠蹠兮招搖咸池之躡躑彈  
遐矚於八埏兮羌一息而萬里紛吾既有此修姱兮又

內飾而秉貞既濯淖於塵滓兮揚陸離之奇文衆譎訛  
以軌轂兮曰余度之孔洵夙微尚之孤潔兮中傍徨而  
自敦彼鵑鵬之搏扶搖兮蜩鸞嫋於尺藩伊九皋之警  
露兮炯一鳴而聞天脂余率於吳甸兮絃余服於燕雲  
紫薇歛而中開兮馭閭闔之緌氛霞旃靡離以髣髴兮  
虹橋滅汨而便旋棄驟耳以先路兮驂玉蚪以承輪吾  
使豐隆撻鼓兮玄冥霖霖而灑塵敕羲仲使控組兮蓐  
收澹滴而解愠玉女要眇以遞進兮笑靨輔以承權綺

穀纖以煜耀兮搖迴風而弗任託蹇修以致詞兮願結  
軫以褫神羌吾恐年歲之遲莫兮怨三秀之既愆指九  
天以為正兮矢沒齒而弗諼攀芙蓉之翠裳兮紉蘿茝  
之秋衣別梗梓與檿柘兮夷薈蔚之蕢蕢芬揭車以盈  
把兮擷素馨之留夷衆女申申以市艾兮既娼桮余之  
蛾眉怙夸汰以比暱兮又嫉余之修詞青蠅營營而播  
穢兮璆璵點而黝黝謂嫫母姣兮謂夷光媼使鉛刀刺  
兕兮匣太阿於園扉纖離伏軾兮款段先之摩尼坳堦

而不御兮櫝魚目而重綈曰余既繫於金柅兮羊腸瘁  
麕以嶽嶽竄竄電曠以磨牙兮魑魍魎魍魎而躩踞玄蜂  
若象兮長蝮結蟠而屢屨廿余肉之乾肝兮齧余骨以  
為養蠹趨踉以含沙兮射余影於湖之湄習摧拉以震  
盪兮重競孰以靡夷恍銃鑿以碣磳兮天柱折而東排  
彼共兜之圯族兮胡岳牧之疇咨崇虎競而撫仕兮逢  
干烙而斧鉞平既放而槁骸兮胥湛僂於鷗皮吾豈不  
知屈躄以存身兮衡而莫之舍也爰集木以惴惴兮亦



惟修姱之故也衆習習以鑠金兮天不辰而憚怒日月  
不照余之節幽兮羌獨佇乎中露伊直道偶偶兮夫焉  
三黜而改度箕不可以簸兮榆不可以食畢焉掩羽兮  
繩馬糾而代結繫輶張而自攣兮又何殊兔絲之與燕  
麥謂九霄高兮余躬既跼相彼厚土兮足靡容而跼跼  
紛逸蹄與廣輪兮競晨征而宵服中忸怩而迤迴兮恐  
疾行之無善跡鳳凰翔於高梧兮爰鍛羽於篋棘龍魚  
服而離罕兮固螻蟻之所搯彼隍中之蕉鹿兮疇云夢

而弗覺粵塞翁之亡馬兮曷罔求而卒獲維禍福之弛  
張兮譬倚蓋之糾纏孰退而為進兮孰爭道而顛蹶於  
皇天之有赫兮鑒下土而靡忒衆仰眎其菅菅兮卒勝  
定而靡克世既溷余之獨醒兮縱鋪醖其焉益荃不察  
余之微忱兮任窈窕之繁飾苟余心之自諒兮寥冥冥  
其何弋居諸忽其不奄兮夏與秋其遞將鴻嘹噉而南  
厲兮露儻零而成霜蟬嘒嘒而夕悲兮卉木黃落而既  
盈鵲鳩之啁啾兮心含悽而中傷緬青陽之不復兮哀

戰寒此衆芳攬叢鞠以掩涕兮沾余襟之浪浪吾恐良  
時之不我與兮瞻美人於一方氤霧鬢翳以沈懣兮白  
日靄靄而無光颼僚慄以泐泐兮砂礫紛飈而颼揚哀  
故都之日邁兮歲序掩掩而電驤驚朱顏之倏改兮玄  
鬢塵而既蒼曷鼎鼎以折折兮悲余心之猶蓬撫短景  
之不留兮顧身名之罔臧夫何脩夜之繇淪兮漏淵溱  
而未央釭明滅以宵習兮蛩蛩唧唧於頽牆魑魅瞠以  
盱窺兮玄鷁齧而跳梁感余夢之靡成兮攬蕙帷而

彷徨朝余稅駕於崑崙兮晡濯足於弱水馳遊驂於大  
荒兮卸余屨於濛汜余與化人歆白鵲之血兮天孫衣  
余以七襄之綺餐瀛洲之玉塵兮吸沆瀣之雲髓安期  
導余以上征兮躡浮雲之旖旎紛霓旌之藻綵兮列宿  
煜燁而纚纚祝融扇余以薰風兮戾太清而爰止閭闔  
砰礪以歲蕤兮繚金罍與瓊卮支旗翠羽蛟螭蟠兮綯  
虹梁之紺陛熊虎狻猊翼以交鉞兮瞻黼座而稽首悚  
肅拜以敷詞兮儻弁粟而喪所勔少艾之結束兮秉先

民之大猶式古訓以自淑兮意燕婉而好修溘瀟落以  
顛越兮策高足而末繇目瞑瞶以黜沕兮神淫佚而憊  
恟吾不能西迴七曜兮寒春而淖秋不能耳視而目聽  
兮陸大壑而濤崇丘翔不能六翮兮潛不可以泳流憫  
余初之未遂兮孰收后與之巢由高居而不復兮列缺  
執余以仇仇余既恟脰而弗申兮重懷懷而離憂聿秉  
度以導晦兮絜蓬蓽而揶龜靈氛嘉余之中誠兮兆告  
余以吉繇曰天不可違兮道不可斁運不可方兮變不

可識肆陰陽之鼓鑄兮孰知其極伊萬有之亭毒兮互  
榮悴而遞易孰成功而不退兮孰剪華而不實孰處亢  
而靡悔兮孰既豫而不革或由升而邁困兮或屯剝而  
求復伊重華之徇齊兮茹草糗而庸陟說胥靡以植菑  
兮舍版築而爰立姜嫄綸於磻溪兮卒鷹揚而諒發嗟  
孔轍之皇皇兮涕西畋而頓躓歌鳳衰以接輿兮劇虎  
牙而見跖斯西行以辭荀兮訖蹈榮而湛族條鄧胙土  
以席恩兮卒貿貿而溝瘠汲卧淮以政清兮湯尊顯而

弁僂雄既美其靈根兮昌懿新而投閣曾不如兩龔與  
逢萌兮身嘉遯而不辱翳彼東方生之突梯兮避金馬  
而玩辱疇云兩美其必合兮夜光抱而贖足疇云朽株  
之終棄兮輪菌玄黃而炳矚懷宿昔之歡豫兮歲冉冉  
而不復苦癩思以侘傺兮亦非余心之所欲省往讐以  
屏營兮中怙憺而曠獨惟大道之無涯兮奚好徑而處  
谷苟玄牝之長存兮安知蝸氏之蠻觸曰道為形根兮  
名為德車靜為躁君兮神為物樞夫唯聖人被褐而懷

玉兮美吾有此瑾瑜苟寸心之罔軼兮歷夷險其焉渝  
倏九天而九地兮吾焉知其所如亂曰鴻濤澎湃巖巖  
漱兮天吳綖緇豺狼嗥兮石室黯黹薪艾蒿兮已矣哉  
世莫我知莽滔滔兮西方美人我心勞兮蘭芷有秀菊  
有夭兮無令荃瓊變為茅兮倬彼雲漢於回昭兮搏心  
抑志光自葆兮白衣蒼狗紛遊以翱兮自我眎之若鴻  
毛兮

抱貞賦

明  
石瑄



帝降命之孔均兮聖作則其未渝紛世路之滉漾兮抱  
吾貞以自居遵難柞之遺矩兮翦蒙茸而令疏車輶輟  
而邁塗兮聽長者之所如被便嬖其絳纒兮疇不知其  
為美信出言之有章兮念禍門之貽悔欲周容以趣好  
兮豈前哲之罔貴顧賦質之既偏兮外若裹其能悖彼  
麋鹿之在庭兮德雖老而未馴有山難之孔武兮寧闢  
死而不論夫惟直以自信兮璧亦不知其白諒物理之  
各正兮有智愚之一德吾既離憂與患兮懼震趾之逢

尤將同羣於鳥獸兮又異氣之不可求思大人之遠遊  
兮雖騁駕乎六合終回翔於故都兮飽湘流之一勺乾  
與坤其並運兮咸得一而清寧維周柱之遺史兮抱無  
名以為經覽萬物之動靜兮固窈焉而各在也溯孔波  
而窺虞源兮閱萬禩而未壞也曷闢而非翕兮氣必斂  
而後散彼春陽之渺瀰兮疇不始於冰霰是用藏感於  
至寂兮若斂華而復根保未發之太和兮殫夜氣之長  
存豈鶉居而穀食兮固無懷之逸民息固有時而作兮

妙精義於八神自屋漏以達大庭兮市與井其交錯鍾  
鼓發而旬旬兮舞豔姬之瓔珞晃白刃之在前兮轟雷  
之破山方澄心於止水兮契先天之泊然富貴固不足  
淫兮恐茹藜之樂改相蠻貊之猶行兮胡衆疑之可詒  
朝兢兢而夕惕兮恒內顧而反聽奉至德以周旋兮踵  
如愚之服膺雖盤水之可奉兮忽覆滿而變盈矧師保  
之弗臨兮不輟步於窈冥質既不逮於松柏兮期後彫  
於歲晏金可渝而石泐兮莫堅貞之銷與善何遘而可

持兮道何取而可遵玩括囊之無害兮首致慮於出身  
黜枝游之穢辭兮發安定於儼若跡考父之循牆兮戒  
子輿之履薄苟由中以潤身兮繫諸家以度邦寧履繩  
而蹈獲兮敢要駕而猖狂繫神聖之至醇兮始聲律而  
躬度徒一間之未達兮尚計仁於月數況末路之崎嶇  
兮華實溷而多違貌修仁而色取義兮假伯車而不歸  
財一善之可稱兮已蠅尊而鼯滿悵藻鑑之日非兮但  
求士於婉孌視中國為帷房兮競獻諛而貢妍何祝鮀

之紛沓兮有江亢之靚曼聖既不可以一蹴兮世波頽  
而風靡非確乎以自任兮寧不亂於譽毀昔夷齊之耿  
介兮違一世而不顧抑士師之直道兮亦三黜而不去  
寧蹈火而赴焦兮忍委隨以干榮甘枯槁而赴淵兮羞  
骯骯之成名豈不行忌夫太潔兮固余懷之所憚總璧  
碎而珠沈兮肯同光乎瓦礫人固有遇不遇兮道豈因  
而窪隆蘭在谷而自芳兮修竹寒而鬱荀芬與華其代  
謝兮鳥翩翩其逝風視喧啾之並舉兮有戛戛之孤鴻

或屠羊而處穢兮或傭身於五穀歌白石於牛衣兮抱  
汲甕於蔬圃咸和光而忍詬兮志與業其不顧吾惟求  
堯舜而不可見兮又安能卹其他息吾駕於疎樾兮解  
吾佩於南沼散寶璐而弛明月兮何杜衡於芳草縱鸞  
鳳而逸騏驎兮非青鳥以為媒颯遠颺之冷冷兮偕上  
帝而往來聖與賢其轂擊兮遇文王於靈囿曰敬止之  
一言兮可終身以為守苟跬步之失中兮風雨作而晝  
冥體且解而弗集兮又何達於神明舟中流而失舵兮

車半途而解轍雖獲禽之如陵兮固智者之所惑况僥  
倖於行險兮競角勝於魚龍恐獨寢之愧衾兮能不失  
色於旌弓仰青天而不憚兮俯清泉而不忤豈求靜而  
遇安兮自拙居而逢樂衆告予以大窘兮胡不轢天衢  
而翱翔無亦有是心兮材乃後乎飛黃彼周公之赤鳥  
兮后夔進而笙簧豈云勝夫一簞兮亦惟天命之所將  
孰不欲體全而用廣兮古與今之可指聖人吾不得而  
見兮庶幾見夫君子吾欲究精微而極之兮畏言繁而

道微託四德之嘉名兮慎幹事之樞機

抱膝賦

有序

明 沈朝煥

余也卽潛有日抱疴經時蒲柳彫殘笑形骸之假攝涼  
暄代謝感流光之易邁虛往實歸保恬亡智還真一域  
釋超萬緣馮生之顯志名篇未窺靈象張子之思玄有  
作徒飾曼詞聊託高眠爰申短賦匪以揆藻揚葩是用  
導達氣意云爾

滲玄液於麗形兮賅骸竅其異造節循虛而林樂兮緘



玄黃而若肖肆馮澤而負衍兮宅靈機之微兆中幅憶  
以樞譎兮終涂憚而疑掉聿蒸菌之靡常兮紛躍冶而  
授儀既執象以跼制亦曳聲而發羈乍排滿而負重或  
捐瘠而離奇夷羣脰於肩肩霍衆眎於睢睢嘈肆懷於  
髣髴分窖縵而若微兀螭螻於卑寢眇娟嫵而脂腴糅  
千形以鼓鑄錯萬狀而殞虛幹流遷以消息乃窮宙而  
靡夷伊肇古先厥初分類乃牙乃角牛首烏喙蒙俱眞  
顛呱吸棄妹勤子屠母形枯質儼僮儻若龐纍纍奔潰

長人巨狄僬僥侏儒何盈何縮厥狀是區叔山惡駭條  
侯讖莩羊舌豺聲豎牛戾膚門黔邑哲仁暴殊趨豐下  
亢宗梱祥當衡王駘介介予祀拘拘夫安知蹢閭之非  
全支離之為庾其皆治化於陰陽之炭而青黃於溝斷  
之餘彼童而昏亦壯以頑繆牽是係柴柵是攔輿髡首  
以怫悵扈羸行而嬖嫫俠烈兮買首而畢志忠信兮自  
屠而納肝信忌鵬以憚犧越棄意而慕羶互龔撼於滿  
心怡撞於世顏既崩騰以排拶亦蹢躅而標編介拶

畫其疑蛻垂缶踵而不顧任啄菹於卵殼乘渺鳥以逞  
還孰索之形骸之外而曠心廣莫之間爰有至人憬爾  
靈悟貼焦原其量趾遠宮隣而擬步首廉麗以薄榮濯  
靈奇而含嫵悼湛河而失航矯瞥天其鍛羽難玉寥而  
璞沈舒滌躍其疇遇維單豹其互斲兮逃裏襮而靡寧  
訛牛哀與鼈令兮紛變化而不經徒覆醢於婞直兮亦  
巨形於質誠曾史煦俞於操藥兮數顏冉於中穌之程  
迺睇冥紀之紘覆兮睨發機而默折即臚情而端策兮

亦恍惚其若缺聊致命以遂志兮體閒怡而覃詰組仁  
義於藻綏兮佩貞亮於珩璚暴潔修於熹光兮沁幽圖  
於汎洌聿信姱以練要兮每執清於內熱審予昌翔於  
世詬兮中當途之驕穉橫汨謀以撓誣兮負喻訛之遺  
累回寒離而玦環兮凜倏收其猶棄憑嘉臚以舒此丹  
慊兮怫然觸象虎而心悸比判妻於逃翟兮求唐子而  
跋扈疲玄戟於隕危兮華唐巔於陪侍金馬漫漶以淮  
落兮名位偶以其隆替幸秩微於解誓兮舞居諸而隙

視於馬覲自厲以修絜兮獨慷慨而雇反悲青春之靡  
遷兮遲白日之婉婉曠遇巷之尚塞兮洵納約之孤蹇  
喜介疾於商兌兮決羸藩其未遠恐雠斂而臭載兮鰥  
厥君而即於汎瀾之坂吾不能登櫟而緣蠡兮故蠲征  
於北路憾大雅之淪亡兮從三立之所慕聊枕藉於簡  
編兮餐沆瀣於竹素罄澄心於儒林曠流覽於武庫顓  
揚班之馭霞鷗淵雲之澍雨眇作者之為曹兮姱代彫  
而肆潔萼蘭芬之歲蕤兮噴長瀾以獨絕虛玄與俶詭

而森奪兮庸提獵於操末躔緯度於正始之壺奧兮擬  
華實於建安之封埒龍雅豔於意匠兮涼非薰白其焉  
掇傲睨百代以引睇兮營魂神化以厚竊變丹青於玉  
瑩兮猶鬱乙以慙巧而自閉夫亦知彫蟲之渺伎兮匪  
衆妙之所尊遂蠹沒以慙生兮託唆詭以孤存重襲卷  
鉅而不可章兮思麾蚤而匿質庠休樊天垂氤而地騰  
氤兮羌廓落而抱乎玄牝之根洞靈威於鼎嬉兮養五  
德於愚菀就碩人以折中兮還吾反乎故宇神介山之

伯子兮異傳巖之葉父嘆首陽之靈根兮躡鬼谷之舊  
武求善卷之所淹兮遇許由於負黍款子高於中野兮  
得伯成而駢伍赴清冷而藏枯兮締邁軸於阿廡意條  
昶以憺憺兮俟回風而容與乘高駝而馭彼閭虛兮指  
五嶽而遨遊來三花於二室兮踞啓石而虛求貫龐鴻  
於天中兮撫垓埏而四周匪乞靈於降神兮通元漠於  
鎮丘蹙巨靈使西傾兮擘雙掌之森張珣明星而佩璫  
兮竄神女之瓊漿博天帝於三峯兮歷欽崙而削成乎

四方餐白氣於金天兮採芙蓉而嗽芳驂背指於恒巒  
兮瞰炎水之潛育徧連縷雲雷於率然兮禱玄光於燕  
玉繳彼鵬吸於幽谷兮揖昌容而洞闡庫北陸循路曠  
以徑通兮覽蓬萊之舊山頰日觀於岱宗兮拾玉泥金  
簡於瑤草之間聽稷丘之青琴兮鑿石釜而解顏羨南  
榮而調饑兮指石囷而漑之列瀟霍於前豆兮沐月館  
而蜚蛇血白馬而囂彼玄夷兮羽二妃而參差虯湘湄  
騎驛驪而稅止兮吞雲夢者八九而邈不知其所如於



是含煙煨割玄契霍稜氛鏹橈琴抨巫咸儼屏翳裴瑤  
蕊艸瓊剗月妃姬雲師嬖岐伯尚方祝融擁篲靈媧按  
節伯僑傍睨忔惺惚以譏恆曼流爛以淫裔踊躍而狂  
趙以章亥趙伋而叫踏乎莽莽洞出鬼壘雄躍天門睽  
睽日月攖捻乾坤招搖太一捫捩崑崙括囊元氣闔闢  
帝閭叩厲列缺舒節北垠箕輝夕斂跋羽朝髡長離拂  
尾素威奮蹲玄冥闕黔雷逐喧展融洩於太始而總  
洪縻於渾元爾乃統攝遐心還反玄對修初服之娑娑

守常閤之昧晦蓋約節而守神羌進道而忘技襲貞良  
之潔白以為范兮製雅頌而為佩仍繫榮而督引兮亦  
過化而遽代無留車而崖返兮慚滌壑之未逮樂權輿  
於自然兮味至德之盛晬互排虛而蹠實兮不窺牖而  
覽造化之常態考則上皇逍遙中林據不死之床撫無  
絃之琴兀然抱膝曠爾長吟吟曰俯仰天地常睢盱人  
生若浮朝露晞兀若土木含天機身無羽翼吝不飛遽  
生卷懷在知非老氏谿谷耽玄微河清難俟兮天不可

梯行道倭遲兮中心有違超絕曠蕩劫來歸匪抱初地  
疇焉依

酬德賦

有序

明  
盧 柟

昔謝宣城作酬德賦以報沈侯柟自庚子歲被誣繫獄  
十年餘自腐朽骸永絕人世趙王殿下憫然鋟柟四賦  
灑以睿藻用雪梧臺之寃壬子冬柟既以上命平反迺  
如趙朝謝王哀其窮錫之珍饌肉藥寵隆渙翰天日疊  
耀方之宣城所感為德何如然神以理超情以文遣匪

辭之麗斯焉取酬於是因謝名篇聊著鄙賦曰

爾迺歲既暮時將竭寒螿鳴流芳歇搖落洲渚沓寥丘  
樊千里直視黯然銷魂情感鶻雞難愁淒斷悵氛濁之  
褊狹馳清想於天埏慨夸父之鄧林弔燭龍於崑崙緹  
余馬兮扶桑枝涉余轡兮桂水湍拾江妃之明璫跨湘  
靈之翠轡於是巖巘互起江河橫變封豕卧啼雄虺坐  
眄夙露傷足晨風瘁肝汨海濟以傾軾歛凌風而鍛翰  
豈蒼蠅之點玉實萋菲之交煽囚圜土兮曳長纓俛寬

顓兮泣吞聲仰飛鳥兮不可攀思日月兮何時明嘉虞  
卿之撰籍希黃霸之授經簡一閱而三歎魂竟夕以九  
升志沈緬以鬱陶氣於邑而填膺揮思彤管裂衷竹素  
秋澀就章風謠託賦信陰陽之迭運遑虧盈之無愆將  
長號於帝閭賴造始於英藩偉神聖之授彩播天人之  
名篇淅瀝液以淫灕紛藻潤而芳妍振金碧之琳琅照  
丹腹之瑋爛羌雲涌以霞馭倏龍變而鳥騫皎若凌天  
河窺織女雲漢之章鏘若升清廟聆師涓洞瑟之絃隣

未伎於何李藉隆譽於謝田翼二京之可紹埒三都之  
並翺警司命之炯旨款士師之酸言爾迺聲流臣工華  
照八表市虎解讒亭姬雪慄返景崦嵫合劒龍沼起灰  
骹兮發夜臺披雲霧兮天門開攬衣帶兮非疇昔踟躕  
躅兮心魂哀於是緩貳負之虐械啓華表之靈思雖城  
郭其如故已人民之半非陟北堂以徬徨痛考妣之先  
違二稚逝以如往一女殞而方歸彼蓬婦之苟活亦老  
醜而堪悲涉園亭以凝眺見蒹葭之蒼蒼橋偃蹇以斷

石壁陟池而橫窗雲幽咽於翠岫葉蕭瑟於銀牀瑤草  
委兮菸壑桂枝彫兮垂牆望佳人兮不還歲將杪兮怨  
長於是季冬嚴寒北風騷屑江雲結凍海煙飛雪蒼隼  
凌飈代馬警節邁世懷賢銜恩赴國仰攀巒岬俯涉清  
洌揭閭闔以延佇導玉階而屏營壁連錢以銜釭牖疏  
鏤而瑣青爛昭華於東序裊翠葆於西清擬承明之彤  
廬或鈞天之帝庭同虬顏之萃渥冠日表之奇煒待螭  
頭以敷辭撫龍翼而若驚爾迺玉音綸發神衷燦亮天

風四敷春陽疊暢八珍馨流三鸞芬颺駝羹已霑鳳炙  
再貺醴酒陳兮汎翠瀾醉起舞兮嬌朱顏願君王兮惠  
一見壽千秋兮歌瑤壇精髣髴其如思情悒鬱而弗安  
步徙倚以舛陞涕淋浪而流泉將振翮以遐舉忽掩臆  
而長歎元雲鬱以凝盼悲風颯而無端昔園門之多險  
嬰金鐵之拘聯效魑魅之微軀望豺虎之一餐敢謬想  
於煙闕覽清輝於鳳鸞德裕命而匪測恩潤身於無垠  
幸濡翰於藝圃銜一羽而塞乎巨川迺為之謠曰若有



人兮滄海湄汲光景兮馭雲螭時蹇產兮隳淵涯宛將  
逝兮長離思大人造兮參南離恢冤網兮超塗泥惠芳  
腆兮恩不訾誠既感兮我心悲揄丹悃兮歷賦詩彌億  
萬兮英聲垂

懷恨賦

晉 潘 尼

伊疇昔之懷憤思天飛以遠迹望循塗而投軌溯朔風  
以理翮冀雲霧之可憑希天路之開闢何時願之多違  
奄就羈以服役因吳坂之峻岨畏鹽車之嚴策嗟遊處

之弗遇莫鬱悒之難任背宇宙之寥廓羅網罟之重深  
當屏氣以斂迹焉遊豫以娛心傳釋板以亮殷望投竿  
而相姬窮獨善以全質達兼利以濟時聃安志於柱史  
由抗迹於蒿箕理殊塗而同歸惟百慮其何思敢因虛  
以託談遂逡巡而造辭

閔水賦

明  
童承叙

王沙公子收吟發興戒御敕騶周遊乎竟陵之陸長眺  
乎江漢之流裴回大堤之旁躊躇故城之上物蹇產而

彫零景蕭森而板蕩精憊以慘慟心忉忉而怔悵還  
過三澁道見漢津父老而問曰何謂其然也父老撫膺  
而長喟攬涕而前陳曰痛乎公子之問人命避巧於構  
室靈胥躍怒於潮波陽侯效力於水窟支祈競怒於洪  
河誠皇天之降匪斯人所能和也公子悵然有問曰嗟  
乎詩咏靡遺之災書紀阻饑之厄今時則然矣若夫民  
之罹病也顛賴之狀得無異乎父老曰殷雷震威蜩螗  
構虐雲滄風迅電激雨作鬱氣滃沱繁湮濡滋林樹霧

迷寰宇晝失黻黻氤氲衆瀾崩渚遺沱碑屹沉沙漱石  
韜三光潛列曜溢天潢瀉丹壑浸淫彫瘵之心沉淪顚  
頷之身烟寂寥而絕炊室垂罄以無營愁雞鳴於如晦  
嗟羶羊之晝行爾其濛濛連瀝膚沸滂沛既彌月以逾  
旬衆沴瘁而虹潰物胥渰而靡孑路淤濘而罕通遂藉  
疾而嫫痠爰抱癭而長終公子曰若是乎其甚乎父老  
曰風姨肆酷噓撼乾維吸收坤軸江洶海湧谷轉山頽  
浪翻波詭岸裂雲迴水怪碣砥河伯崔嵬礮若地坼豁

若天開龍飛揚以瞋目蛟騰驤而飛沫鯉一角而噴浪  
鷁九首而滑礪匡隄為之泐坼區夏為之昏濁居飄颻  
於驚飈舟推折於深湍或挈妻以蹈溺或抱子以赴沉  
或委體於盤渦或托骨於瀟潏偃仰兮混淪之府蹢躅  
兮魚龍之區或載浮而載沈羌孰諗其止居公子曰若  
是乎其甚乎父老曰歲暮時昏風起雲沈掩霞翳日積  
晦累陰霰兮淅瀝雪兮紛緜密兮若絕疎兮若連穿細  
微透乘危暗摧掇之指裂親之體虧如圭斯方如璧斯

圓如縞斯白如玉斯寒斯時也火井滅溫泉冰炎風勁  
陽谷凝起瑤城於粉野攢瓊枝於玉樹天地閉而嚴肅  
蘊隆結而寒沍於是蔽縹之夫枵腹之民膚發刺其骨  
栗烈鑽其形乃傍徨而殍仆偃蹇而惇乳暴枯骸於交  
達橫遺骼於蕪城使肉飽乎饑烏臭避乎過客蓋終古  
之青億類之極惋也公子酸顰而捧心歔歎而改容重  
進父老而告之曰詩曰哀恫中國具贅卒荒靡有膂力  
以念穹蒼斯是之謂歟雖然今聖明昭燭德意懇惻遠

選臺司賑出帑積加以使命者率甘棠之政司牧者盡  
召杜之德父老其將被如天之仁蒙掩骨之澤升父母  
之堂就衽席之側當不淪沒於陷阱展轉於溝洫也迺  
為鴻雁之歌以廣之曰鴻雁歸來兮河之側河之漣淪  
兮菰蒲其實可飲可食兮去將焉極鴻雁來歸兮河之  
央河之清冷兮蒹葭蒼蒼可棲可宿兮去將焉翔鴻雁  
歸來兮河之濱沙波淨渟兮畢羅不驚返爾高翮兮其  
究安寧歌竟父老再拜加額受命踴躍而去公子迺罷

御叱徒僂步永嘆歸疏所聞危坐待旦

懷思

幽思賦

有序

明  
顧起元

歲壬癸間顧子屬有所感徘徊黯然援筆賦之則有繩  
之者曰古之賦也勸百而諷一若無乃為歸荑握椒者  
噉矢乎且夫香纓靡曼何必文府哉顧子曰唯唯否否  
理有衡之而塞情有抑之而揚是以濮上桑間太史不  
廢巫姬湘女騷客志思意有攸衷非以淫示也客啟罔



而退

夫何一佳人兮步翩翩以自娛修顏抑其若揚兮紛玉藻而瑇瑳孌初楊之旖旎兮美薜華之閒都榆東海之阿錫兮佩瑤璐而紹明珠薄薺葉其不御兮滋茝蘭於綺疏走鬣定以騰盼兮志舉蹇而踟躕玄髮澤而可以鑒兮曼睩流波之欲瀾絙瑤瑟而不忍彈兮願抽憑而永歎羞鶯羽之差池兮感女牀之文鸞闕西隣之嫺麗兮影欲就而復安鳩告余以自媒兮心猶惡其諛謾而

佻巧蹇予而四顧兮望瑤池之青鳥指明星以為期  
兮托微波而通辭蘭氣吐而若凝兮芳容澹而若思五  
音紛高堂而繁會兮羌獨目成而心與雨霏霏其步檐  
兮雲容容而承宇垂翠幃與曲瓊兮藝迷迭與都梁演  
天老之素儀兮陳祕戲於軒皇乍霍靡若扶渠之汜淥  
波兮又髣髴乎明月之逸夜光意嬋嬋而不自持兮思  
婉孌而恐其不得當懼緯繡之數化兮要大神為余昭  
之闔浮雲之驟合兮忽流飈而間之惟宴娛之曠瞬兮

怨沛祖之須臾何雙鵲之担橋兮獨塊鞠此鷄雛回風  
既咲矜而搖茹蕙兮明月又露瞳而散碧梧朱絃慘而  
不揚兮遺玄醴之湛玉壺不心知其亦已兮孰別離之  
可忍氣涓瀟其若波兮心緊綦其若韌菀余懷之邑邑  
兮霑余淚之浪浪車踉蹌而不前兮馬蹢躅而不行余  
既樹筵蓐與菀路兮佇候時乎吾將采惟曜靈之西匿  
兮懼朱顏之易改雁南翔而離離兮驚北逝而翩翩固  
知余情其信孀以練要兮願及君之盛年閉房櫳之青

苔兮私掩涕而御蕙纓何黃姑之與織女兮耿銀漢而  
相望擷秋菊之鬣英兮畏滿園之白露獨申旦其不寐  
兮魂營營而至曙系曰我所思兮在鍾山欲往從兮江  
水潺美人贈我兮玉如意何以報兮合驩被浮雲駛兮  
西北馳春草萋萋兮王孫歸

永慕堂賦

有序

明  
顧起元

永慕堂者吾師京兆少尹毅軒周公慕其太翁太夫人  
而作也夫五十而慕大聖猶難公立朝三十餘載今且

儼然華顛矣而孺慕不衰於少古之人乎何以踰也小  
子元夙佩仁風誦蓼莪之篇舊矣敢泚筆以賦之其詞  
曰

繫維斗之孕靈兮闡坤珍於雲陽仍佳氣於黃山兮芙  
蓉矗而頽霞張薇水建瓴而漿淑兮倒屈注於天潢茲  
山之鬱鬱兮挾綠宇於黃囊總柏挂采蚪於明月兮碧  
楸鳴鴉鳴於凜霜封馬鬣而隱金椎兮負若斧而馮若  
坊擢嶧嶺之華表兮豐夷峻之朱堂攬歸雲於藻井兮

枕騰日於茄梁薜荔繽紛而網戶兮申椒酷鯁以被唐  
畹滋蘭而畝樹蕙兮搖風振而遞芳唯大夫之顧瞻兮  
中涓瀟其若探湯神惝怳而孔填兮步夷猶而方皇懷  
二人於明發兮詠飛隼之載揚昔汝南之樹德兮祛舊  
風於斯邦俛仰而蔭彼數人兮譬寶劔之下將學王膺  
而遠引兮披二酉而銓三蒼愕風隋而雲走兮鳴枯管  
之琅琅冠切雲之崔嵬兮葺菱荷以為裳疏玉除而緝  
桂橈兮紛旖旎乎都房喈鳳卜之雖酥兮叶繇體之將

將惟清心而玉映兮嗣彤管於孟光靡抱冲而弗盈兮  
疇惇固而勿昌產龍媒於渥洼兮麗鳳羽於岐陽排玉  
門而逕閭闔兮覽阿閤而迴翔職柱後之惠文兮補袞  
闕於未央眎金鑪與玉鉉兮握蘭蕊而含香回適于  
而披昌兮形蹙跂於神羊躬廁踰而紆綵兮忽乘雲乎  
帝鄉左招搖而右豐隆兮鞭列缺而轅雲將咲寶婺之  
挺暉兮趾曜靈而繼藏孔蓋翠旂之翩翩兮挹婉衿與  
東王青鳥集於飄飈兮鵠鷗啼於空梁河予涕之潄潄

兮海予淚之浪浪帝閭信信在鬱蕭兮孰召歲崇與巫  
陽載儼詞於飛離兮爰告哀於上皇繩玉簡與金泥兮  
挾天藻於黃腸欵合璧之不停兮痛音徽之莫彰神髣  
髴於總幃兮燈的歷於金釭眠南雲而綰歎兮步列星  
而極明銜終卹於旻天兮孰俾予之可忘帝求直於簪  
劍兮騁驄馬於康莊厲排風於鵬鷖兮靈當道之豺狼  
播箕澤惟豐芑兮陋鉅筭之趙張視門左之桑弧兮丈  
夫生而志四方練予情其信糾以天紹兮唯蓼莪之盡



傷咏白華於周雅兮奠桂醑而御椒漿陳羅薦授彼玉  
案兮峙粢粢與饔飩闔華顙之肩肩兮純孝思之有常  
彼艾首而遐慕兮於姚氏之煌煌踵徽音於旅樹兮耦  
龐德於鳩郎盱茲堂之兀聿兮天辟址於陵岡下竹苞  
而上松茂兮配二儀而久長亂曰天性罔泯人靈植兮  
六鑿既攘彝德數兮鮮民之生靡銜卹兮有美人兮純  
孝一兮含德之厚心如結兮高堂戕戕音靡遯兮鬱陶  
思親載營魄兮孝橫四海六幽塞兮援神司契世乃奕

兮子孫振振螽斯揖兮濟哲維祥考斯室兮於萬斯年  
永無極兮

懷君子賦

元 楊 襄

緊岑樓之翼翼兮倚層城之隩隈敞八窗以軒豁兮仰  
飛甍之崔嵬面雲山之矗矗兮喧江聲之若雷肆瑤席  
以鄭重兮呈琅玕與瓊瑰誕延賓之翠館兮倚吹簫之  
鳳臺蹇羅幃之芙蓉兮盼美人而和偕羌素懷而耿耿  
兮望青鸞之不來謹修容以遙睇兮隔雲軿乎徂徠宛

清夢之繾綣兮忽中宵以驚猜步廣庭以夷猶兮瞻牛  
女而徘徊援猗蘭以寫抱兮拂素琴之凝灰希盛年以  
綢繆兮何參辰之或乖憶黃鳥之嚶嚶兮感賓鴻之獨  
哀炯予心之如璧兮悵遠道而悠哉已矣乎燕議詘兮  
訓狐是咤荃蕙疎兮蔓草盈階曷歸去兮翦故山之萊  
望玉京兮閭闔漫浮雲兮不開整羅襪以予沾白露  
兮蒼苔仰碧虛之明月庶流影於君懷

別知賦

明  
趙時春

平涼趙時春既放逐於涇水之陽筭頭之麓友魚鳥而  
伍麋鹿南山戚子秀夫釋輜轄而訪焉曰吾聞聖人不  
役役於時而蟬蛻於物上故實之而冰消爍之而春盎  
河淮橫流巨靈天吳顛巔吞雲而砥柱呂梁之碣不移  
也吾子奈何解朱絃以紐犁埋韶護之清賞伏龍光於  
重淵溷於泥而長往負鹽車而垂耳忘萬里之雄想曷  
以翹首奮翼嘯青雲以欲上騰驤於九達之衢俟軒蓋  
之高敞苟黃虞之有作猶庶幾於方響使汙廓而靡倡

竟闕寂而孰與為黨乎時春曰唯唯夫子所言乃見田  
躍淵之志蓋未覩於盤蠓潛蚪之事也蚤負禪而振股  
視九華瑤池之境猶鉅厠也異哉軒轅氏之問彼髣髴  
焉知其具茨乎田有秬秠無羨福荔釋躋息蔭以誇連  
騎操椎攻堅不藉鋒穎之利故聖人喟然於浴沂而擊  
節於顏氏興漆雕之深說數有望於由賜故曰達人安  
命君子不二仁者見之謂之仁智者見之謂之智百姓  
日用而不知庶幾乎義皇之治戚子嗚然而笑稱詩曰

振清風兮被皓月南山萃律兮涇流焉歇執策援綏載  
脂而別

望遠賦

明石瑤

懷滄茫之美人兮睇恒山之長麓歷高岡之千仞兮騁  
青雲之華轂西望封龍東瞻信都凌霄振衣溯風縱呼  
氣橫九垓天開五湖羌欲去而遭迴兮睨荒墩之碧蕪  
乃有却秦故城盟齊舊址禾黍西風萋蕪漢水逢去燕  
之望諸兮得田叔之梓里問前路於征夫兮訊山林之

野史訪棄瓢之老父兮求擊筑之巨豪贈昆山之玄瑛  
兮解明月之佩刀發劉琨之清嘯兮等萬事於鴻毛山  
欲暄兮雲萋萋谷無人兮鳥嘈嘈瞰梧桂之氤氲兮想  
雙鳳之鳴翺盼芻兒之躑躅兮感雍門之悲謳果孟嘗  
之不來兮亦平原之罔留緊陵谷之變遷兮曾幾人之  
駐輶忽兩曜之徂邁兮挾八風而周流於是九州縱瞻  
萬里入視山河縵迴百獸崛起叫衡陽之歸雁兮送天  
池之鵬徙要海上之安期兮論義農之曩軌采瑤草而

漫吟兮據高梧而假寐  
倏心曠而神逸殆不假於熊經  
而烏跂吾不知世之忘人人之忘世也乃絕洪源復睹  
秦人桑麻蔭翳俎豆龐敦歌流擊壤禮謹汗尊餐朝霞  
之既多掇秋露之實繁拉芳鄰而共集傾高盖而定言  
夏后夔之鳴球撼千尺之雲根藹流沙之捧捧忽瀾漫  
乎崑崙瀚海北注大江東奔碣石嵯峨巨嶽雄蹲蓬萊  
方丈不可以跬越兮儼眉睫之且存予乃發昆吾相鄧  
林斂遠翮披雄襟岱華礪錡洞庭淬鐔起萬窟之蛟鼉



兮俾歌且舞以助吾之長吟


思歸賦

宋梅堯臣

祿有可慕祿有可去何則移孝為忠曾無內顧則祿可  
慕而可據上有慈顏以喜以懼故祿可去而不可寓噫  
吾父八十母髮亦素尚爾為吏夏焉遐路嗷嗷晨烏其  
子反哺我豈不如鬱其誰訴惟秋之氣至慘慄而感人  
日生愁思側睇江濱憶為童子當此凜辰百果始就迭  
進其珍時則有紫菱長腰紅芡圓實牛心綠蒂之柿獨

苞黃膚之栗青羊連區烏桺五出鴨脚受彩乎微核木  
瓜鏤丹而成質素乳之梨蘋壺之橘蜂蟬淹醯榘植漬  
蜜膳羞則有鵝鵲野雁澤鳬鳴鶉清江之膏蠓寒水之  
鮮鱗冒以紫薑雜以菱首觴浮茱菊俎薦菁韭坐溪上  
之松篁掃門前之桐柳僕侍不譁圖書在右或靜默以  
終日或歡言以對友信吾親之所樂安間里其茲久切  
切余懷欲辭印綬固非效淵明之褊衷恥折腰於五斗  
蓋自成人以及今未嘗一日侍傍而稱壽豈得不決去

於此時將恐貽恨於厥後



御定歷代賦彙補遺卷十八